

**Kõkõbĩ ãlu ni
Yūwánĩ
ní sũ rĩ
Tã búkũ rĩ vé rĩ ã ũlũngará**

Yūwánĩ Yēsũ vé 'bá áyúâyũ rĩ sĩ kõkõbĩ 'dĩri 'bá urukõ adri'bá Kūrīsītīyánĩ rú rĩ pi ní, lē kōpi sũ anji ívé ni tĩni. Kĩnĩ, lē kōpivé āsámvú Múngú be rĩ, āzini Kúrísitõ be rĩ ã adri múké. 'Yo kōpi ní 'bá āngũ ímbá'bá kánísã agá ũnjõ sĩ rĩ pi vé tã. Yūwánĩ kĩnĩ, ọtú ĩ ríkí adrií Yēsũ be trú, 'í nĩ rá, Yēsũ ri 'bá áda, ĩri Mvã Múngú vé ni. Kĩnĩ, kōpi 'bãkí dõ ẹsĩ Yēsũ drĩgẹ rá, kōpi ídri 'dání'dání rĩ ịsú rá. Kĩnĩ, kōpi Kūrīsītīyánĩ rú, lē kōpi ã lēkí Múngú ri lēlē, āzini kōpi ã lēkí ĩ lēlē ĩ āsámvú gé sĩ.

'Bá idri sēepi rĩ

¹ Í'dóngará gá 'dãá, Ụ'dúkọ idri sēepi rĩ, ĩri anigé, 'bá yìkí ĩrivé ụ'dúkọ rá, 'bá ndrekí ĩri 'bã mị sĩ rá, 'bá úlókí rú'bá ni 'bã drị sĩ rá, 'bá ní ríí tã ni ũlũú ĩmi ní 'dĩ. ² 'Bá idri sēepi rĩ i'da 'i 'bá ní rá! 'Bá ndrekí ĩri 'bã mị sĩ rá. 'Bã nóni ri idri 'dání'dání ọtú adriípi Ẹtẹpi Múngú be trú ĩ ní i'daá 'bá ní rĩ vé tã ũlũú ĩmi ní. ³ 'Bã rị ĩmi ní tã 'bá ní ndreé 'bã mị sĩ, āzini 'bá ní yị 'bã bí sĩ rĩ ũlũ, 'bã úmúkí rí 'bã adrií ĩmi be trú, āzini 'bã úmúkí rí 'bã adrií Ẹtẹpi be trú, āzini Mvọpi Yēsũ Kúrísitõ be trú. ⁴ 'Bã sĩkí tã 'dĩ'bée sēe ĩmi ní, 'bã úmúkí rí 'bã adrií ĩmi be trú, 'bã adrikí rí ĩmi be āyĩkõ sĩ.

Múngú ri dī sū ũtúná tịni

⁵ Ụ'dúkọ 'dīri 'bá yíkí íngázú Yésū vúgá, 'bá ní rií ũlúú ĩmi ní 'dī kīnī, Múngú ri dī āngū ĩngbērē sū ũtúná tịni, tã āzi índrēpi sū ĩnịná tịni rụ' 'bá nì gé 'dāáyo. ⁶ 'Bá 'yokí dō kīnī, 'bá ícíkí 'bâ āsámvú Múngú be rī ícá ngá ālu gí, 'bo 'bá áwíkí dō adrii ĩnịná agá rií ũnjīkānyā 'oó, 'dīri lū 'yozú kīnī, 'bâ ũnjó rú, tã 'bá ní 'oó rī adri tã áda ku. ⁷ 'Bo 'bâ dō ri adri ũtúná agá, sū Múngú ní dīi ũtúná rú rī tịni, 'bá 'bâ úmú adri 'bá Múngú vé rī pi be trụ. Múngú Mvọpị Yésū vé ārí, ĩri 'bávé ũnjīkānyā ũjī 'bâ rụ' 'bá gá sī céré.

⁸ 'Bá 'yokí dō kīnī, 'bâ ũnjīkānyā ākó, 'bâ ri 'bâ mị ũ'bā, tã áda 'bá ẹsị agá 'dāáyo. ⁹ 'Bá ũlūkí dō 'bávé ũnjīkānyā Múngú ẹndrẹtị gé rá, Múngú ri ẹsị 'bā tã pịrị 'ozú, ĩri 'bâ trū 'bávé ũnjīkānyā agásī rá, āzini ĩri 'bávé ũnjīkānyā ũjī rá. ¹⁰ 'Bá 'yokí dō kīnī, 'bâ ũnjīkānyā ākó, 'dīri lū 'yozú kīnī, 'bâ ri 'yo, Múngú ri ũnjó rú, ĩrivé ụ'dúkọ múké 'dīri 'bá ẹsị agá 'dāáyo.

2

¹ Má anji rī, á sī kọkọbị 'dīri sēé ĩmi ní, ĩmi 'okí rí ũnjīkānyā ku. 'Bo 'bá rī 'o dō ũnjīkānyā, 'bá āzi pá tuúpi 'bávé tã tị gé átápi Ẹtẹpi be ni anigé, 'bá rī Yésū Kúrísítō adriipi pịrị rī 'i. ² Yésū Kúrísítō adi 'i sēé drāá 'bávé ũnjīkānyā ũjizú 'bâ rụ' 'bá gá sī, ũjī 'yéńá 'bávé ũnjīkānyā ọ'dúkụlẹ ku, ĩri 'bá vū drịgẹ rī pi vé ũnjīkānyā ũjī céré.

³ 'Bá 'dukí dō tǎimbị Múngú vé rī ngaá rá, 'bâ ícọ nị áamá 'yozú kīnī, ádarú 'bá nīkí Múngú ri

rá. ⁴ 'Bá rĩ 'yo dō kīnī, 'í nī Múngú ri rá, 'bo 'dụ dō tǎimbị Múngú ní ẹziị rĩ ngaá kuyé, 'bá 'dĩri ũnjó rú, nị tǎ áda Múngú ní ẹziị rĩ kuyé. ⁵ 'Bo 'bá 'dụkí dō tǎ Múngú ní ẹziị rĩ ngaá rá, tǎ 'dĩri lū 'yozú kínī, ádarú 'bǎkí lèngará Múngú vé rĩ adrií 'bá ẹsị agá gí. Kúru 'bā ícọ nị áamá 'yozú kínī, 'bávé ǎsámvú Múngú be rĩ ícá múké gí. ⁶ 'Bá rĩ 'yo dō kīnī, 'i 'bá Múngú vé ni, lē ā 'o tǎ rĩ, sụ Yésụ ní 'oó rĩ tịni.

Tǎimbị ú'dí rĩ

⁷ Īmi mávé ũndī má ní lēlē rĩ pi, tǎ má ní sī sēē ĩmi ní 'dĩri adri tǎimbị ú'dí ni kuyé, ĩri tǎimbị ụkụ ĩ ní ọtụ sēē ĩmi ní, ĩmi ní Yésụ ri ẹ'yǐzú rĩ gé 'dāri. Tǎimbị ĩ ní 'yoó kínī, lē ā lēkí 'bá lēlē 'dĩri, ĩri tǎimbị ĩmi ní ọtụ yị drīdrī 'dāri. ⁸ 'Bo tǎ má ní sī sēē ĩmi ní rĩ, ĩri ádarú tǎimbị ú'dí ni, Yésụ vé tǎ 'oó rĩ lū 'yozú kínī, lē kpá ā ndrekí tǎ áda tǎimbị rĩ vé rĩ ĩmī rụ'bá gá, ā'diātāsīyā tǎ 'oó ịnịná agá rĩ ā vúgú ẹ 'i gí, ụtúná ri nóni ri ka nī.

⁹ 'Bá rĩ 'yo dō kínī, 'i ụtúná agá, 'bo 'bā dō ẹsị ũnjí ọgúpị ní, áwí 'dĩri adrií kuú ịnịná agá. ¹⁰ 'Bá 'í ẹdrípị ri lēpí lēlē rĩ, ĩri 'bá adriípi ụtúná agá ni, ngá ǎzi ĩri ẹsị agá sēepi ĩri ní tǎ ũnjí 'ozú ni 'dǎáyo. ¹¹ 'Bo 'bá ẹsị ũnjí 'bǎápi 'í ẹdrípị ní rĩ, ĩri drī kú ịnịná agá ụgōgō, ĩri ri ẹcī tu ịnịná agá, nī kuyé 'i dō ri mụ ngōlé, ā'diātāsīyā ịnịná ọzụ mị ni gí.

¹² Īmi mávé anji má ní lēlē rĩ pi, á sī tǎ 'dĩri sēē ĩmi ní,
 ǎ'diātāsīyā Múngú trū ĩmi ũnjíkányā agásī
 gí Yésụ ā rụ sī.

13 Īmi má étépījī, á sī tā 'dīri sēé ĩmi ní,
 ā'diātāsīyā ĩmi nīkí Kúrísítō adriípi
 í'dóngará gá 'dālé anigé rī gí.

Īmi kērīanji rī pi, á sī tā 'dīri sēé ĩmi ní,
 ā'diātāsīyā ĩmi ndēkí ādróko ri gí.

Īmi mávé anji má ní lēélē rī pi, á sī tā 'dīri sēé
 ĩmi ní,
 ā'diātāsīyā ĩmi nīkí 'bá Ẹtẹpi Múngú ri gí.

14 Īmi anji Múngú vé rī pi, á sī tā 'dīri sēé ĩmi ní,
 ā'diātāsīyā ĩmi nīkí 'bá Ẹtẹpi Múngú ri gí.

Īmi má étépījī, á sī tā 'dīri sēé ĩmi ní,
 ā'diātāsīyā ĩmi nīkí Kúrísítō adriípi
 í'dóngará gá 'dālé anigé rī gí.

Īmi kērīanji rī pi, á sī tā 'dīri sēé ĩmi ní,
 ā'diātāsīyā ú'dúkọ Múngú vé fiípi ĩmī ẹsị agá
 rī
 sē ĩmi tukí pá ũkpó ũkpó ĩmivé ẹ'yīngará
 agá,
 sē ĩmi ndēkí ādróko ri gí.

Ā 'bākí ẹsị tā nyọọkú nōri vé rī drīgé ku

15 Lē ĩmi 'bākí ẹsị tā nyọọkú nōri vé rī drīgé ku,
 dōku lē ĩmi fikí ũnjīkānyā nyọọkú nōri vé rī 'oó
 ku. 'Bá rī 'bā dō ẹsị tā nyọọkú nōri vé rī drīgé,
 ícọ ẹsị 'bāá 'bá Ẹtẹpi ri lēzú ku. 16 Tā nyọọkú nōri
 vé rī, ĩri sē 'bá rī tā rú'ba nōri vé rī 'du nga áyu,
 sē ĩri ẹsị 'bā āmbúgú ngá drīgé, ĩri adri āfú rú.
 Tā 'dī'bée adrikí tā 'bá Ẹtẹpi ní lēé ā 'okí rī kuyé,
 tā 'dī'bée tā nyọọkú nōri vé ni. 17 Tā nyọọkú nōri
 vé rī, āzini ẹsị 'bá rī pi ní rií 'bāá ngá nyọọkú nōri
 vé rī pi drīgé rī, ĩri ímú de rá. 'Bo 'bá Múngú vé
 tā 'duúpi ngaápi rī, ĩri ídri 'dáni'dáni rī ísú rá.

Ari'ba Yësü Kúrísítõ vé rĩ pi

18 Mâ anji rĩ, ú'dú ỳdũ vé rĩ ícá gí. Īmi yĩkí ĩmĩ bĩ sĩ rá kínĩ, ārí'bagú Kúrísítõ vé rĩ ri ímũ 'dĩ'dĩ, nóni ari'ba Kúrísítõ vé rĩ pi ícákí kárakará gí. Sē 'bá nĩkí áamá ānĩ 'yozú kínĩ, ú'dú ỳdũ vé rĩ ícá gí. 19 Ari'ba 'dĩ'bée, kòpi fũkí 'bá āsámvú gé nòósĩ, kòpi ẹ'yĩkí Yësü ri sũ 'bá ní ẹ'yĩ rĩ tĩnĩ kuyé. Kòpi ẹ'yĩkí té dõ Yësü ri sũ 'bá ní ẹ'yĩ rĩ tĩnĩ rá, kòpi té áwí adri 'bá be trũ. Kòpivé fũngará 'bá āsámvú gé sĩ 'dĩri lũ 'yozú kínĩ, kòpi ẹ'yĩkí Yësü ri sũ 'bá ní ẹ'yĩ rĩ tĩnĩ kuyé.

20 'Bo Yësü ri Uleteré, sē ívé Índrí Uleteré rĩ ású ĩmi gí, sē nóni ĩmi nĩkí tã áda Múngú vé rĩ gí. 21 Á sĩ ĩmi ní kòkòbĩ 'dĩri sée 'yozú kínĩ ĩmi nĩkí tã áda rĩ kuyé yã 'dĩni ku, ĩmi nĩkí tã áda rĩ rá, ā'diātāsīyā tã áda Múngú ní i'daá rĩ agá, ũnjõ 'dãáyo. 22 'Bá ũnjó rú rĩ ā'di 'i? 'Bá ũnjó rú rĩ, ĩri 'bá 'yoópi Yësü adri Kúrísítõ ku rĩ 'i. 'Bá 'dĩni 'dĩri, ĩri ārí'bá Kúrísítõ vé ni, 'bá 'dĩri gã Ẹtẹpi Múngú rĩ sĩ, āzini gã Mvọpi Yësü rĩ sĩ. 23 'Bá Mvọpi Yësü ri gãápi sĩ rĩ, gã kpá Ẹtẹpi Múngú ri sĩ, 'bá Mvọpi Yësü ri ā'yĩpi rá rĩ, ā'yĩ kpá Ẹtẹpi Múngú ri rá.

24 Kúru ú'dúkọ múké ĩ ní ímbá ĩmi ní í'dóngará gá 'dãá, ĩmi ní yĩ ĩmĩ bĩ sĩ 'dĩri, lē ĩmi 'bãkí kuú ĩmĩ ẹsĩ agá. ĩmi 'bãkí dõ tã ni ĩmĩ ẹsĩ agá rá, ĩmi áwí adri ĩmi Ẹtẹpi Múngú agá, āzini Mvọpi Yësü agá. 25 'Bá áwíkí dõ adrii Múngú agá, 'bã ícọ ídri 'dáni'dáni Kúrísítõ ní ẹzĩ rĩ ịsú rá.

26 Á sĩ tã 'dĩri sée ĩmi ní, ĩmi ã adrikí rí mị be kọwụ 'bá lē'bá ĩmĩ mị ù'bã'bá 'dĩ'bée vé tã sĩ.

27 'Bo nóni Kúrísítō sē Índrí Uletere rĩ ású ĩmi gí, ĩri nóni ri adri ĩmi agá, ĩmi gōkí nóni ímbángará lēé dǐi ku, Índrí Uletere rĩ ĩmi ímbá nĩ. Tā ĩri ní ímbá rĩ adri ũnjō ku, ĩri tā áda. Nóni lē Índrí Uletere rĩ ā ású ĩmi, lē ĩmi áwíkí ĩmi ĩkpāá adrii Kúrísítō ā rǔ'bá gá, sǔ Índrí Uletere rĩ ní ĩmi ímbá rĩ tǐni.

Anji Múngú vé rĩ pi

28 Má anji rĩ, lē ĩmi áwíkí ĩmi ĩkpāá adrii Kúrísítō ā rǔ'bá gá, Kúrísítō kādō ímví ĩgōó, 'bá ícókí adrii ũrĩ sĩ ku, āzini 'bá ícókí adrii drĩnjá sĩ ku ĩri ɛndrɛtǐ gé.

29 ĩmi nĩkí rá 'yozú kínĩ, Kúrísítō ri tā be pǐrǐ, ĩmi nĩkí kpá rá 'yozú kínĩ, 'bá tā 'oópi pǐrǐ rĩ, ĩri adri Mvá Múngú vé ni.

3

1 'Bá Ẹtẹpi Múngú lē 'bâ ambamba, ĩ ní 'bâ zǐzú ānĩ Múngú vé anji 'dĩ. Ádarú 'bâ anji Múngú vé ni. Tā 'bá nyōṣkú nōri drĩgé rĩ pi ní 'bâ nǐzú ámázú kuyé 'yozú kínĩ, 'bâ anji Múngú vé ni rĩ, kōpi nĩkí Múngú ri kuyé. 2 ĩmi mávé ũndĩ má ní lēélē rĩ pi, 'bâ nóni anji Múngú vé ni, Múngú ri dō úmvúlésĩ ímú 'bâ újá adri íngóni yā, i'da drĩ 'bá ní tā ni kuyé. 'Bo 'bá nĩkí rá 'yozú kínĩ, Kúrísítō kādō ímví ĩgōó, 'bâ ĩri ndre rá, 'bâ ímú adri sǔ ĩri tǐni. 3 'Bá ẹsǐ 'bāápi Kúrísítō drĩgé rĩ, ĩri adri ule, fi ũnjĩkǎnyā 'oó ku, sǔ Kúrísítō ní adrii ule ũnjĩkǎnyā ākó rĩ tǐni.

⁴ 'Bá ũnjĩkãnyã 'oópi rĩ, ñõ tãĩmbĩ Múngú vé rĩ gí. Ũnjĩkãnyã ri, ĩri Múngú vé tãĩmbĩ ñõngará.

⁵ ĩmi ñĩkĩ rá 'yozú kìnĩ, Yésũ ímú 'bávé ũnjĩkãnyã ũjĩ 'bâ rú' 'bá gá sĩ gí. Yésũ 'o ũnjĩkãnyã ãluñani kuyé. ⁶ 'Bá rĩ ĩkpã dō 'i kú rú' 'bá ni gé, ícó ũnjĩkãnyã 'oó ãĩ ãĩ ku. 'Bá rĩ dō ri ũnjĩkãnyã 'o mužú, 'bá 'dĩri ñĩ ĩri kuyé, áamá ĩri kuyé.

⁷ Mâ anji rĩ, lē ĩmi sēkĩ 'bá āzi ā ũ' 'bã ĩmĩ mĩ ku. 'Bá tã 'oópi pĩrĩ rĩ, Múngú ẽndrẽtĩ gé, ĩri 'bá pĩrĩ, sũ Kúrísítō ní adriĩ pĩrĩ rĩ tĩnĩ. ⁸ 'Bá riĩpi ũnjĩkãnyã 'oópi rĩ, ĩri 'bá ādróko vé ni, ā'diātāsīyã ādróko í'dó ũnjĩkãnyã 'oó ĩ ní drĩ 'bũ pi gbizú vũ be kuyé rĩ gé 'dãá, 'bo Mvã Múngú vé rĩ ímú ẽzĩ ādróko vé rĩ izaá drĩ ni gé sĩ rá.

⁹ Anji Múngú vé rĩ pi ícókĩ riĩ ũnjĩkãnyã 'oó ku, ā'diātāsīyã úri Múngú vé rĩ adri kōpi ẽsĩ agá. Sē kōpi 'okĩ ũnjĩkãnyã ku, ā'diātāsīyã Múngú 'du kōpi 'bãá anji ívé ni pi rú gí. ¹⁰ 'Bã anji Múngú vé rĩ pi ñĩ áamá rá, 'bã kpá anji ādróko vé tã 'du' 'bã nga' 'bá rĩ pi ñĩ áamá rá, ā'diātāsīyã 'bá tã 'oópi pĩrĩ ku, 'í ógúpĩ ri lēpi ku rĩ, adri mvã Múngú vé ni ku.

Lē 'bã lēkĩ 'bã lēlē

¹¹ Ũ'dúkó múké Múngú vé ĩmi ní yĩĩ í'dóngará gá 'dãá rĩ lũ kìnĩ, lē 'bã lēkĩ 'bã lēlē. ¹² Lē 'bã adrikĩ sũ Káyĩnã ándúru riĩpi ādróko vé tã 'oópi ẽdrĩpĩ ri 'diĩpi drãapi rĩ tĩnĩ ku. Káyĩnã 'di ẽdrĩpĩ ri āsĩ? Káyĩnã 'di ẽdrĩpĩ ri, ẽdrĩpĩ ní tã 'oó Múngú ẽndrẽtĩ gé pĩrĩ rĩ sĩ, 'bo tã Káyĩnã ní 'oó rĩ Múngú ẽndrẽtĩ gé ũnjĩ. ¹³ Má ẽdrĩpĩĩ má ómvúpĩĩ, 'bã nyõókũ drĩgē ñõgó rĩ pi ndrekĩ dō ĩmi ũnjĩ, ĩmĩ ẽsĩ ā tĩ ānĩ ku. ¹⁴ 'Bã lēkĩ dō 'bã lēlē,

ĩri lū 'yozú kɨnĩ, 'bá ĩfũkí drā agásĩ gí, 'bá ɨsúkí ɨdri 'dání'dání rĩ gí. 'Bá ɛdrɨpɨ ri lēepi ku, āzini ɔmvúpɨ ri lēepi ku rĩ, ĩrivé ɨndrí áwí drāá kuú ávũ rú. ¹⁵ 'Bá ɛsɨ ũnjí 'bāápi ɔgúpɨ Yēsũ ri ɛ'yĩpi gí rĩ ní rĩ, ĩri 'bá riipi āngũ ú'dɨpi ni. Ĩmi nĩkí rá 'bá āngũ ú'dɨpi rĩ, ɨsú ɨdri 'dání'dání rĩ ku.

¹⁶ Lēngará vé tã, ĩri 'dɨni, Yēsũ Kúrísítõ adi 'i sēe drāá 'bã tã sĩ. Lē 'bã adikí 'bã sēe drāá 'bá ɔgũpɨi Yēsũ ri ɛ'yĩ 'bá gí rĩ pi vé tã sĩ, sũ Yēsũ ní 'i adii sēe drāá rĩ tɨni. ¹⁷ 'Bá rĩ dõ ngá be, ndre dõ ɔgúpɨ ri ngá ākó, ko dõ ɔgúpɨ ẽ ĩzã ngá sĩ ku, lēngará Múngú ní 'bá rĩ pi lēzú rĩ ɛsɨ ni agá 'dāáyo. ¹⁸ Má anji rĩ, ā lēkí āngũ tɨ sĩ kána ku, ádarú lē ĩmi lēkí ĩmi ɔgũpɨi lēlē, ĩmi kokí kɔpi ẽ ĩzã ngá sĩ koko. ¹⁹ 'Bá lēkí dõ 'bá ɔgũpɨi lēlē, 'bã ɨcõ nĩ ámá 'yozú kɨnĩ, 'bã ri tã áda 'o, ĩri sē 'bã ɛsɨ ri adri āyĩkõ sĩ, 'bá kãdõ rií Múngú vé tã ũsũú. ²⁰ 'Bã ɛsɨ ā ri dõ n̄õ ũnjĩkãnyã 'bá ní 'oó rĩ sĩ drāáāsĩyã, Múngú ri āmbúgú, nĩ tã 'bá ɛsɨ agá rĩ céré rá, tã āzi Múngú ní n̄ĩ kuyé ni ālunani 'dāáyo.

²¹ Ĩmi mávé ũndĩ má ní lēélē rĩ pi, 'bá ámákí dõ 'yozú kɨnĩ, 'bá 'okí ũnjĩkãnyã kuyé, 'bã adri Múngú ɛndrɛtɨ gé ũrĩ ākó. ²² 'Bá zɨkí dõ ngá Múngú tɨ gé, ĩri sē 'bá ní rá, ā'diātāsĩyã 'bã ri tã ĩri ní ɛziĩ 'bá ní rĩ 'dũ nga rá, āzini tã 'bá ní 'oó rĩ, ĩri Múngú ní āyĩkõ sē. ²³ Múngú ɛzi 'bá ní 'dɨni kɨnĩ, 'bã ɛ'yĩkí 'i Mvɔpi Yēsũ Kúrísítõ ri, āzini 'bã lēkí 'bã lēlē 'bã āsámvú gé sĩ, sũ Yēsũ ní ɛziĩ rĩ tɨni. ²⁴ 'Bá tãĩmbɨ Múngú vé rĩ 'dũ 'bá nga 'bá rá rĩ pi, kɔpi úmúkí ĩ adrii Múngú be trú gí, Múngú ri adri kɔpi be trú. Tã 'bá ní n̄izú

ámázú 'yozú kīnī, Múngú ri adri 'bá be trų rī, ĩri ní Índrí Uleterē rī ĩpěé 'bâ ású rī sī.

4

Lē ĩmi ámakí índrí rī pi ámámā

¹ ĩmi mávé ũndī má ní lēélē rī pi, lē ĩmi ẹ'yīkí índrí rī pi vé tā mužú bādārú ku. Lē ĩmi ámakí índrí rī pi ámámā, índrí rī pi dō Múngú vé ni, dō kōpi índrí āzi túngú ni pi. Ā'diātāsīyā nẹbī ũnjó rú rī pi kárakarā, kōpi ayikí mužú vū drĭgé sī, kōpi ri tā ũnjō vé ni pi ũlū mužú 'bá rī pi ní. ² Tā ĩmi ní ícózú Índrí Uleterē Múngú vé rī nĭzú ámázú rī, ĩri 'dīni, nẹbī 'yoópi kīnī, tĭkí Yēsū Kúrísítō ri ĩfūú 'bá áda rú rī, nẹbī 'dĭri índrí Múngú vé rī rų'bá ni gé anigé. ³ 'Bo nẹbī 'yoópi kīnī, tĭkí Yēsū ri 'bá áda rú kuyé rī, nẹbī 'dĭri índrí Múngú vé rī rų'bá ni gé 'dāayo, ĩri āri'bá Kúrísítō vé ni. ĩmi yĭkí rá 'yozú kīnī, āri'bágú Kúrísítō vé rī ri ímụ 'dĭi'dĭ, nóni ícá gí, ĩri vū drĭgé nōgōnō.

⁴ Má anji rī, ĩmi anji Múngú vé ni, ĩmi ndēkí nẹbī ũnjó rú 'dĭ'bée gí, ā'diātāsīyā Índrí ẹzĭ ngaápi ímĭ rų'bá gá rī, ũkpō ni aga índrí ẹzĭ ngaápi nyōókú drĭgé nōgó rī vé rī rá. ⁵ 'Bá ũnjó rú 'dĭ'bée, kōpi 'bá Múngú ri nĭ'bá kuyé ni pi, kōpi ri tā nyōókú nōri vé rī átá, 'bá Múngú ri nĭ'bá ku rī pi ri kōpivé tā 'du ẹzĭ ngazú. ⁶ 'Bā 'bá Múngú vé ni. Tā 'bá ní ícózú Índrí tā áda átápi rī nĭzú, āzini índrí ũnjó rú rī nĭzú ámázú rī, ĩri 'dīni, 'bá Múngú ri nĭ'bá rá rī pi, kōpi 'bávē tā

'du ẹ̀zị ngazú rá, 'bo 'bá Múngú ri nǐ' 'bá ku rǐ pi, ícókí 'bávé tǎ 'duy ẹ̀zị ngazú ku.

Lēngára Múngú vé rǐ

⁷ Ɔmi mávé ũndǐ má ní lēlē rǐ pi, lē 'bâ lēkí 'bâ lēlē, ǎ'diātāsīyǎ lēngára íbí íngá Múngú vúgá. 'Bá lēkí dō 'bâ lēlē, Ɛri lū 'yozú kǐnǐ, 'bâ anjǐ Múngú vé ni, 'bá nǐkí Múngú ri rá. ⁸ 'Bá āngū lēepi ku rǐ nǐ Múngú ri kuyé, ǎ'diātāsīyǎ Múngú ri 'bá āngū lēepi lēlē ni. ⁹ Múngú i'da ívé lēngára 'bá ní létì be 'dǐni, Ɛpē ívé Mvǎ ālukútaǵá rǐ nyōókú drǐgē nōgó, 'bâ Ɛsúkí rí ídri 'dǎni'dǎni rǐ ǎní bēnǐ. ¹⁰ Lēngára agaápi rá rǐ, Ɛri 'dǐni, Múngú lē 'bâ lēlē, Ɛpē ívé Mvǎ ímú drǎá rōbōṅṅó rú 'bâ trūzú 'bávé ũnjǐkǎnyǎ agásǐ, adri 'yozú kǐnǐ, 'bá lēkí Múngú ri nǐ 'dǐni kuyé. ¹¹ Ɔmi mávé ũndǐ má ní lēlē rǐ pi, sū Múngú ní 'bâ lēlē rǐ tǐnǐ, lē 'bâ lēkí 'bâ lēlē. ¹² 'Bá ǎzi ndre Múngú ri āluǵáni kuyé. 'Bo 'bá lēkí dō 'bâ lēlē, Múngú ri adri 'bá agá, ádarú lēngára Múngú ní 'bâ lēzú rǐ, 'bâ 'bǎ ku 'bá ẹ̀sǐ agá.

¹³ Múngú sē 'bá ní ívé Índrí Uletere rǐ gí, sēzú 'bá ní nǐzú ámázú ǎní, 'bâ adri Ɛri agá, Ɛri adri 'bá agá. ¹⁴ Ɛtépì Ɛpē ívé Mvǎ ímú 'bá rǐ pi paá ívé ũnjǐkǎnyǎ agásǐ. 'Bá ndrekí Mvǎ rǐ 'bâ mǐ sǐ rá, 'bá ní nóni rií Ɛrivé tǎ ũlūú 'bá vū drǐgē rǐ pi ní 'dǐ. ¹⁵ 'Bá rǐ ẹ̀'yǐ dō kǐnǐ, Yēsū ri Mvǎ Múngú vé ni, Múngú ri adri Ɛri agá, Ɛri kpá adri Múngú agá. ¹⁶ Ádarú 'bá nǐkí rá 'yozú kǐnǐ, Múngú lē 'bâ lēlē. 'Bâ ri ẹ̀sǐ 'bǎ Múngú drǐgē, Ɛri ní 'bâ lēé agaá rá rǐ sǐ.

Múngú lē 'bá rī pi lēlē. 'Bá rī lē dō 'í ógúpì ri lēlē, ìri adri Múngú agá, Múngú ri adri ìri agá. ¹⁷ Ádarú 'bá lēkí dō 'bâ lēlē, sū Kúrísitō ní āngū lēé vū drīgé nōgó rī tīnī, 'bá ícókí adrií ú'dú Múngú ní ímúzá tã lizú 'bá rī pi drīgé 'dãri sī ũrī sī ku. ¹⁸ 'Bá āngū lēepi lēlē rī, ícó adrií Múngú sī ũrī sī ku. 'Bá ní ũsūú 'yoó kīnī, Múngú ri 'bâ ìrīñã rá rī sī, ìri sē 'bâ adri ānī ũrī sī. 'Dīri lū kīnī, 'bá ũrī ní fīí éśí ni agá rī, lēngárá Múngú vé rī éśí ni agá 'dãáyo. ¹⁹ Múngú ní í'dó 'bâ lēé drīdrī rī sī, sē 'bâ ri 'bâ lēlē 'bâ āsámvú gé sī ānī. ²⁰ 'Bá rī 'yo dō 'í lē Múngú ri rá, 'bo ìri dō ri éśí ũnjí 'bâ édrīpì ní, ìri ũnjó rú. 'Bá 'í édrīpì 'í ní ndreé rá rī lēepi ku rī, ícó Múngú ĩ ní rú' 'bâ ni ndreé ku 'dãri lēé ku. ²¹ Tãimbì Múngú ní ẹzìjì 'bá ní rī ìri 'dīni, lē 'bâ lēkí 'i lēlē, āzini 'bâ lēkí 'bâ ọgúpìjì lēlē.

5

Lē 'bâ ẹ'yīkí Múngú Mvópì ri

¹ 'Bá Yésū ri ẹ'yī' 'bá 'yo' 'bá kīnī, Yésū ri Kúrísitō 'i rī pi, 'bá 'dī' 'bée anji Múngú vé ni, 'bá Múngú ri lē' 'bá lēlē rī pi, lēkí kpá anji Múngú vé rī pi lēlē. ² 'Bá lēkí dō Múngú ri lēlē, āzini 'bá 'dúkí dō tãimbì ìrivé rī pi ngaá rá, 'bá nīkí rá, 'bâ anji Múngú vé rī pi lēlē. ³ 'Bá 'dúkí dō tãimbì Múngú vé rī ngaá rá, ìri lū 'yozú kīnī, 'bá lēkí Múngú ri lēlē. Tãimbì ìrivé rī ã ngangárá adri ũkpó ũkpó ku, ⁴ ã'diātāsīyã anji Múngú vé rī pi ũkpó be, kòpi tã ũnjí 'bá nyọ̀ókú drīgé nōgó rī pi ní 'oó rī gã sī. 'Bá ní Yésū ri ẹ'yījì gí rī sī, 'bâ ícó tã ũnjí nyọ̀ókú nōri vé rī gã sī. ⁵ 'Bá Yésū ri ẹ'yī' 'bá gí,

'yo'ba kīnī, Yēsū ri Mv́a Múngú vé ni rī, kōpi 'bá tā ũnjí nyōókú nōri vé rī pi gā'ba sī rī.

⁶ Tā lūupi kīnī, Yēsū Kúrisitō ri Mv́a Múngú vé ni rī, ĩri tā ĩ ní Yēsū ní bātízīmū sēzú yī́ agá rī, āzini ārí raápi rú'ba ni gé sī pētī alambaku sígé rī. Adri 'yéná yī́ kuyé, ĩri yī́, āzini ārí raápi rú'ba ni gé sī rī. Índrí Uleterē rī lū tā 'dīri nī, ā'diātāsīyā tā Índrí Uleterē rī ní lūu rī, ĩri tā áda. ⁷ Ngá tā rī ē mī lūupi rī pi ngá na. ⁸ Ngá rī pi 'dī, Índrí Uleterē, yī́, āzini ārí. Ngá na 'dī'bée, kōpivé tā ru 'i ngá ālu. ⁹ 'Bá rī pi kádō ríí 'bá ní tā átá, 'bá ri ẹ'yī rá, 'bo tā Múngú ní átá rī ndē 'bá rī pi ní átá rī rá, ā'diātāsīyā Múngú átá tā rī nī, átá tā 'i Mv́opi vé rī. ¹⁰ 'Bá Mv́a Múngú vé rī ẹ'yī́pi rá rī, ẹ'yī́ tā Múngú ní átá rī rá. 'Bo 'bá tā Múngú ní átá 'i Mv́opi ā tā sī rī ẹ'yī́pi ku rī, 'bá 'dīri kīnī, Múngú ri ũnjó rú, ā'diātāsīyā ẹ'yī́ tā Múngú ní átá 'i Mv́opi vé tā sī rī kuyé. ¹¹ Múngú 'yo 'dīni kīnī, 'í sē 'bá ní ídri 'dáni'dáni rī gí, ídri 'dīri íbí íngá 'i Mv́opi vúgá. ¹² 'Bá rī ẹ'yī́ dō Múngú Mv́opi ri rá, ĩri ídri 'dáni'dáni rī ísú rá. 'Bo 'bá rī ẹ'yī́ dō Mv́opi ri kuyé, ísú ídri 'dáni'dáni rī ku.

Ídri 'dáni'dáni rī vé ísúngará

¹³ ĩmi 'bá Múngú Mv́opi ri ẹ'yī́'ba gí 'dī'bée, á sī kōkōb́í 'dīri sēé ĩmi ní, ĩmi nīkí rí 'yozú kīnī, ĩmi ídri 'dáni'dáni rī ísú rá. ¹⁴ 'Bá nīkí áamá múké múké, 'bá zíkí dō ngá Múngú vúgá, tā ni 'de dō ẹsì ni gé 'dāá múké, ĩri ícó ngá 'bá ní zī́ rī sē 'bá ní rá. ¹⁵ 'Bá nīkí dō 'yozú kīnī, 'bá kádō ngá zī́ Múngú vúgá, ĩri sē 'bá ní rá, ádarú ngá 'bá ní zī́ rī, Múngú ri sē 'bá ní rá.

16 'Bá rĩ ndre dō ógúpi Yésũ ri ẽ'yĩpi gí ni 'o ũnjĩkãnyã, ũnjĩkãnyã ĩri ní 'oó rĩ ícó dō ĩri jĩ fí ĩzãngã deępi ku 'dãri agá ku, mi ícó Múngú ri zĩ ĩri ní rá, 'bá mí ní Múngú ri zĩ ĩri ní 'dĩri, ĩri ícó ídri 'dání'dání rĩ ĩsú rá. Ũnjĩkãnyã ụrukọ'bée ãngũ jĩ fi ĩzãngã deępi ku 'dãri agá, á 'yo 'yozú kínĩ, mí zĩ Múngú ri 'bá ũnjĩkãnyã 'oópi 'dĩri tĩnĩ rĩ ní kuyé. 17 Tã 'bá ní rií 'oó ũnjĩ ũnjĩ rĩ pi céré ũnjĩkãnyã, 'bo ũnjĩkãnyã ụrukọ'bée anigé, 'bá rĩ ícó fíí ãní ĩzãngã deępi ku 'dãri agá ku.

18 'Bá nĩkí áamá rá 'yozú kínĩ, anji Múngú vé rĩ pi 'okí ũnjĩkãnyã mužú dđĩ dđĩ ku, ã'diātāsīyã Mvã Múngú vé rĩ ri kọpi ùtē nĩ, ãdróko ícó kọpi 'oó ũnjĩ ku. 19 'Bá nĩkí rá 'bã anji Múngú vé ni, 'bo 'bá Múngú ri ẽ'yĩ'bá ku rĩ pi ãrēvú céré, ãdróko ọrú kọpi ẽ drĩ gí. 20 'Bá nĩkí rá 'yozú kínĩ, Mvã Múngú vé rĩ ícá vũ drĩgé nōgó gí, sē 'bá nĩkí Múngú áda rĩ áamá ãní gí, sē nóni 'bá adrikí kuú Múngú áda rĩ agá, ãzini ĩrivé Mvã Yésũ Kúrisítō agá. Múngú 'dĩri Múngú áda rĩ, ãzini ĩri Múngú ídri 'dání'dání rĩ sēępi rĩ. 21 Má anji rĩ, ĩmi ndrekí múké, ẽ ĩnjĩkí ngá ĩ ní údé múngú rú rĩ pi ku.

Ū'dúkó Múké Múngú vé rị

Keliko: Ū'dúkó Múké Múngú vé rị New Testament+
copyright © 2017 Wycliffe Bible Translators, Inc.

Language: (Keliko)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

14717198-957a-524c-b31f-2c3197945b20